

06/01/1998

Bersatu hadapi kegawatan

Syed Ibrahim Ghulam Rasul

KEGAWATAN ekonomi yang melanda negara sekarang mestilah dianggap sebagai suatu cabaran awal yang harus ditangani menjelang abad ke-21. Ketika inilah dunia bergolak dan hampir semua negara bersaing untuk membuktikan kemampuan masing-masing.

Namun begitu, bukanlah tugas negara kita untuk mula bersaing dengan negara Barat tetapi kita sedang menggalas suatu beban yang mesti dipikul jika ingin menyertai negara lain di seluruh pelosok dunia bersaing dalam pelbagai aspek meliputi politik, ekonomi dan sosial.

Sudah pasti rakyat negara ini berada dalam keadaan cemas, panik dan hilang punca apabila nilai mata wang negara menjunam setiap hari. Sungguhpun begitu kita harus percaya, kini kita sedang berada di bawah perlindungan seorang insan yang memang terkenal di serata dunia sebagai pemimpin bijak dan komited, intelektual, berpandangan jauh dan patriotik.

Pemimpin itu tentulah Perdana Menteri Datuk Seri Mahathir Mohammed. Seluruh pemimpin Asean percaya 100 peratus kebolehannya mengatasi kegawatan ekonomi yang melanda negara Asia amnya dan Asean khususnya. Tugas kita sebagai warga Malaysia bukan saja terletak pada kebijaksanaan kita untuk menguruskan pendapatan dan agihan keluarga, tetapi lebih penting ialah semangat dan sokongan padu seluruh warga Malaysia berdiri teguh di belakang pemimpin kita dan menyokong segala paradigma, reformasi yang sedang dilakukan pemimpin dalam usaha untuk menstabilkan kembali ekonomi.

Pada saat genting seperti ini, orang luar yang diibaratkan seperti 'gunting dalam lipatan' sedang berusaha melancarkan konflik dalaman supaya berlaku pergolakan di Malaysia yang sememangnya dinantikan oleh segolongan fanatik yang menetap di luar negara. Jika rakyat tidak mampu bersabar sekarang dibimbingi itulah juga sikap mereka menghadapi abad ke-21. Mereka tidak sanggup menerima cabaran, krisis atau konflik yang semata-mata diadakan untuk menguji tahap kematangan fikiran manusia.

Rakyat adalah segala-galanya. Langkah yang diambil itu tidak dapat mencapai objektifnya jika rakyat tidak memberi sokongan kepada pemimpin. Mulalah berjimat dari hari ini dan janganlah membantah segala tindakan yang diambil kerajaan walaupun ia memeritkan keadaan kita. Di mana ada kemahuan di situ ada jalan. Sokongan rakyat membolehkan kerajaan mengatasi kegawatan ekonomi dalam tempoh beberapa bulan saja. Bagi pihak swasta pula, saya merayu agar patuhilah segala tindakan kerajaan dan janganlah memikirkan keuntungan untuk beberapa bulan ini. Marilah kita memohon ke hadrat Ilahi agar abad ke-21 menjadi abad yang indah untuk seluruh masyarakat dunia dan masyarakat Islam.